



**Te Kāwanatanga o Aotearoa**  
New Zealand Government

# Tatou talanoa i le malupuipua o le atunuu: National Security Long-term Insights Briefing

Faaaofia i faatalatalanoaga le toatele o tagata eseese i totonu o Aotearoa Niu Sila i lamatiaga e ono tutupu i le malupuipua o le atunuu, luitau ma avanoa.

Oketopa 2022

# Upu Tomua

Talofa lava

**Waiho i te toipoto, kaua i te toiroa** (Tatou tumau i le galulue vavalalata, ae lē o le galulue tūtūmamao)

O le National Security Long-term Insights Briefing muamua lenei ma e tulaga ese ai lava.

Na taimua le Department of the Prime Minister and Cabinet ma le Ministry of Foreign Affairs and Trade e fai ma sui o le Security and Intelligence Board i le faafoeina o le galuega lenei<sup>1</sup>. Na faagasolo galuega e aunoa ma le aiaina e minisita ma le Malo o pulea le atunuu i le vaitaimi lenei, ma e tagai i suiga o le taatiaga o faiga o malupuipua ai le atunuu ma folasia nisi o avanoa mo le lumanai.

E aafia tatou uma i le malupuipua o le atunuu. Na matuai ogaoga aafiaga na feagai ma o tatou tagata mai talitonuga matuiā tele; o aafiaga mai osofaiga faainitaneti i a tatou pisinisi, matātā tau tupe ma le soifua maloloina; o le faaauau pea o le matautia o faiga maopoopo a tagata solitulafono faapea ma le soloia o tulaga tau pulega faavaomalo, ma le maopoopoga e maua mai ai, a o taumafai nisi o atunuu e pulepuletutū i mea o aiaina e isi atunuu.

A o tatou feagai pea ma aafiaga o le COVID-19 o salalau i le atu laulau, o le vave faatupulaia o suiga o le tau ma le vave salalau o faamatalaga sese ma le faasalalau ma le mautinoa o faamatalaga sese, ua faapena ona tofotofoina lo tatou malamalama i faiga faamata'u faasaga i le malupuipua o le atunuu ma lo tatou gafatia ona tali atu i mea o tulai mai.

E tau auala atu i le oototoga lenei, le taulai o talatalaga ma le toatele o tagata eseese i Aotearoa Niu Sila i le malupuipua o le atunuu – matou te fia faaso atu faamatalaga i nisi o aafiaga ma luitau e sili ona afaina ai le malupuipua o le atunuu. E tusa ma lo tatou tulaga o se tasi o malo aoao, e ia i tatou le pule e filifili ai auala tatou te tali atu ai. E avea le faateleina o faatalalanoaga ma le mamalu o le atunuu i le malupuipua o le atunuu, e mafai ai ona tatou sauni ma faatupu le vave faafoisia o lo tatou malosi tatou te tali faatasi atu ai i luitau nei ma lo tatou malamalama tutusa i faiga e gafatia ona tatou laasia ai le agai i luma.

Ua matou faasalalauina le ata faataitai o le oototoga lenei mo le faatalanoaina o manatu o tagata lautele, a o lei faamae'aina lelei i le faaiuga o le tausaga.

E momoli atu la matou faafetai ia i latou uma na faailoa mai o latou manatu ma lo latou sao i le oototoga lenei. Ua matou faamaonia i talanoaga na faia le tāua o le malupuipua o le atunuu, ma le tāua o le faaso atu i taimi uma o faamatalaga. O le tasi o auala e laasia ai lea faamoemoe o le faia o le oototoga lenei.

Na faavae le taatiaga o le oototoga lenei i manatu o tagata lautele, faamatalaga i mea e ono lamatia ai le malupuipua o le atunuu i le lumanai, o suesuega faavaomalo ma faamaumauga faafuainumera o faamauina e le Statistics New Zealand. O loo faagasolo i le taimi nei le sailia o manatu e tusa ma se taatiaga o foliga o le malupuipua o le atunuu i le lumanai, ma auala e mafai ai ona tatou faaso faatasi ma le toatele o tagata eseese i Niu Sila ina ia faaoga manatu e fausia ai galuega faatino.

## ATA FAATAITAI - E LĒ O SE TAIALA FAVAE A LE MALO

E momoli atu la matou faafetai i le faaavanoa o lou taimi e tuuina mai ou manatu i le ata faataitai o le otootoga lenei.

Sau se taimi ona matou maua lea o sou finagalo ma manatu ma faapena ona tatou galulue ai pea e feaasoa'i manatu.

Ma le faaaloalo lava



Tony Lynch  
Taitaifono, Security and Intelligence Board

## Talofa lava

O le auga tonu na faavae ai le Long-term Insights Briefing o le puipua ma le faasolo i luma o le malupuipua o Aotearoa Niu Sila – tatou tagata, tatou atunuu ma mea o tatou aiaina – tatou mafau fau lelei i auala e maua ai le ola lauusi i nei vaitaimi ma le lumanai.

O le mataupu e fia faatalanoaina o le ootoga leni o le **Talatalaga ma le toatele o tagata eseese i Aotearoa Niu Sila i lamatiaga faasaga i le malupuipua o le atunuu, luitau ma avanoa.**

Aemaise lava, i le tele o aafiaga ma luitau i le malupuipua o lo tatou atunuu – e pei o osofaiga faainitaneti, faiga faaterorisi, talitonuga matuiā, faasalalau ma le mautinoa o faamatalaga sese, ma soligatulafono maopoopo. O loo folasia ai nisi o manatu e lagolagoina ai le malosi ma le faatuatua o le malupuipua o le atunuu, e aofia ai le talatala o manatu o Tagatanuu Niu Sila e tonu ma talafeagai i ai tulaga nei.

E lē o se mataupu faigofie le faatalanoa o le malupuipua o le atunuu, ae agatonu ona tatou faatalanoa auā le faamautinoaina o le saogalemu ma le malupuipua o Niu Sila i le lumanai mo ē o nonofo, galulue ma asiasi mai i le atunuu. Matou te talitonu i le faia o talatalaga e lē taomia ai manatu, e faaofia uma ai, ma e mafai ona auai ai ma le malo, ma o se faiga lea e fesoasoani e atiae le faatuatua ma le talitonuga mautinoa, ma faamalosi atili ai le malupuipua o le atunuu. E tau auala atu i le ootoga leni se faamoemoe e siitia ai le malamalama ma le iloa i le malupuipua o le atunuu. Matou te talotalo o le amataga leni o se talatalaga ma felafolafoaiga sili atu i le lumanai.

Matou te fia iloa ou manatu i auala ua matou saunia ma e talia manatu faaalua uma ma fautuaga.

## O le tala na faavae i ai le ootoga leni

O Long-term Insights Briefings o se auala fou mo matagaluega a le malo, e faatino galuega e aunoa ma le aiaina e Minisita, e tau saili ma lipotia faaletonu e tāua i le lumanai o le soifua manuia o tagata i Niu Sila.

O le [Royal Commission of Inquiry](#) i le osofaiga faaterorisi i le malumalu muselemi i Kalaiesetete o fautuaina ai le malo e toe sasaa le fafao i auala e mafai ai ona auai tagata o faia i ai le tautua – ia atiae se siosiomaga e maua ai e Tagatanuu Niu Sila uma le saogalemu ma le faaofia o i latou uma. Matou te fia faaoga le ootoga leni e mafai ai ona matou laasia tulaga nei i le vaitaimi mamao, e maua mai ai ou manatu ma tau saili faiga e atiae ai foliga o le malupuipua o le atunuu i le lumanai.

E iva matagaluega a le malo na latou saunia le ootoga leni ma o le matafaioi a matagaluega nei le puipua o Niu Sila mai mea e afaina ai le malupuipua o le atunuu. E faavae i luga o se suesuga lautele, suesuga ma faatalatalanoaga ma le mamalu o le atunuu sa faia. Na matou maua ai le faatāua e Tagatanuu Niu Sila o le malupuipua o le atunuu, ma e fia iloa tulaga ua iai galuega o taumafai atu i ai, ma e fia avefa ma vaega o faatalatalanoaga o fuafuaga i le malupuipua o Niu Sila mo le lumanai.

O se tulaga lea e avea ma faalaeiau, ona o le aveavea'i o le lavelave o aafiaga i le malupuipua o lo tatou atunuu ma e moomia le faaaofia o Tagatanuu Niu Sila uma i taumafaiga ua tatou faia e puipua lo tatou atunuu mai lamatiaga.

E faaoga e le ootoga leni suesuega ma faamatalaga na matou maua mai tagata, pisinisi, ma matagaluega a le malo e tagai ai i tulaga nei:

- suiga autu o vaaia i le atu laulau e tosina ai le malupuipua o Niu Sila i le isi 10 tausaga o sosoo ai ma faasolo atu i le 15 tausaga
- o nisi o aafiaga ma luitau i le malupuipua o le atunuu ma e faapefea ona suia i le isi 10 faasolo atu i le 15 tausaga
- o vaega autu e ōno lagolagoina se lumanai malosi mo le malupuipua o le atunuu i le lumanai.

*Faamolemole ia manatua, e ui i le saunia o le ootoga leni e aunoa ma le aiaina e minisita ma e lē o se taiala faavae a le Malo, ae ua saunia i se vaitaimi tonu o faia ai le tele o taiala faavae a le Malo mo le fia faia o suiga i le malupuipua o le atunuu – aemaise lava i le New Zealand's first National Security Strategy ma le toe iloilo o matafaioi ma le faataatiaga o le faiga faavae o le malupuipua o le atunuu (e pei ona fautuaina e le Royal Commission of Inquiry i osofaiga faaterorisi i le malumalu muselemi i Kalaiesetete).*

*O loo tau saili foi i le ootoga leni manatu autu tutusa ma isi Long-term Insights Briefings na saunia e le malo– aemaise lava i le ootoga na faia e le Public Service Commission i le fesili faatupu manatu “E faapefea ona tatou faaleleia atili le lagolagosua e mafai ai e le mamalu o le atunuu ona auai i meafai a le malo i le lumanai?” ma le ootoga na taimua ai le Department of Internal Affairs o talatala ai le fesili faatupu manatu “E faapefea ona faaleleia atili le auai ma le faaaofia o le mamalu o le atunuu i faaiuga fai e auala atu i tekonolosi?”*

## Mai le amataga lava – suesuega ma talatalaga

E tusa ma vaega o le atinaega o le oototoga lenei, na matou sailia faamatalaga i le malupuipua o Aotearoa Niu Sila mai le tele o alagaoa.

Na aofia i la matou suesuega:

- se National Security Public Survey<sup>2</sup> <https://dpmc.govt.nz/our-programmes/national-security/national-security-long-term-insights-briefing/2022-ipsos-national> – o se suesuega tutoatasi na faia ma le 1,000 ma ona tupu tagata i Aotearoa Niu Sila, ma e iai la matou faamoemoe e faia i tausaga taitasi. Na taulai le suesuega i manatu, lagona, ma le malamalama o Tagatanuu Niu Sila, ma le lautele o aafiaga i le malupuipua o le atunuu, luitau ma avanoa i Aotearoa Niu Sila.
- o manatu faaalua mai uluai faatalatalanoaga o le mataupu – na matou maua ai manatu tusia e 105 o le mamalu o le atunuu, faalapotopotoga ma pisinisi. Na lagolagoina e manatu nei le mataupu, ma na faaalua e i latou na auai le moomia o le toe mafaufau i le tele o aafiaga i le malupuipua o le atunuu ma luitau ma ia faia se faiga e lē noatia ai le faali o manatu ma galulue soosoo tauau ai i faatalanoaga o le malupuipua o le atunuu. E mafai ona e faitau i se aotelega o manatu faaalua nei i le <https://dpmc.govt.nz/our-programmes/national-security/national-security-long-term-insights-briefing/ltib-topic>
- o faamatalaga mai matagaluega a le malo na aofia i le faiga faavae o le malupuipua o Niu Sila<sup>3</sup>
- faamaumauga ma suesuega o mafai e le mamalu o le atunuu ona maua mai Niu Sila ma atunuu mamao.

O iuga na maua mai suesuega ma uluai faatalatalanoaga ma le mamalu o le atunuu na mafai ai ona matou maua se malamalamaaga loloto i le faauigaina e Tagatanuu Niu Sila o aafiaga i le malupuipua o le atunuu, luitau ma avanoa. O faamatalaga nei na mafai ai ona matou tuu faatasia le oototoga lenei – ma mafai ai ona matou faailoa vaega tonu e mafai ona matou saunia ai le tele o faamatalaga ma maua gofie.

## O itu na matou maua – e tāua mo lou silafia

O faamatalaga na matou aoina mai e auala atu i le National Security Public Survey, manatu faaalua, suesuega ma isi alagaoa mai le mamalu o le atunuu, na faailoa mai vaega autu e tolu o loo fai ma popolega i le lumanai o le malupuipua o le atunuu:

- e faauigaina e Tagatanuu Niu Sila le faatuputupulaia o le faamata'uina o le malupuipua o le atunuu
- o mea o tutupu i le atu laulau ma le faatuputupulaia o suiga ua afaina tele ai le malupuipua o Niu Sila, ma le
- eseese o talitonuga mautinoa i le gafatia e le malo ona tali atu.

### E telē se faamamafa e Tagatanuu Niu Sila faatusa i tagata o isi atunuu o faiga faamata'u

Na aofia i le National Security Public survey le tele o ituaiga faiga faamata'u, aafiaga ma luitau i le malupuipua o le atunuu. O le vaega lautele leni ua mafai ai ona matou malamalama atili i le faauigaina e le mamalu o le atunuu o le tele o ituaiga faaletonu, ma e mafai ona tatou faatusa ma iuga o suesuega na faia i atunuu mamao.

Na maua mai le suesuega leni, le telē o se faamamafa e Tagatanuu Niu Sila faatusa i tagata o isi atunuu o faiga faamata'u.

E lē o se tulaga e faate'ia ai le popole o Tagatanuu Niu Sila pe tutupu mala faalenatura, talu ai le lamatia gofie o le atunuu i mafuie, lologa, oge ma mauga mu. E avea i tatou ma se tasi o atunuu i le lalolagi e sili ona afaina gofie i mala faalenatura. E limataitaiina le malo i se faiga tuufaatasia e tali atu ai i mala faalenatura, ma e taulai i le: tuuitiitia, sauniuni, tali atu ma le toe faaleleia. E maua nisi faamatalaga i le faiga tuufaatasia leni i le

[www.civildefence.govt.nz/cdem-sector/the-4rs/](http://www.civildefence.govt.nz/cdem-sector/the-4rs/).


E muamua lava i mafaufau o tagata le salalau ai o faama'i, a o tatou faia pea galuega e tali atu ai i aafiaga faifai pea o le COVID-19. E maua nisi faamatalaga i faiga na tali atu ai i le

[www.health.govt.nz](http://www.health.govt.nz) ma le

<https://covid19.govt.nz/>.

### National Security Public Survey

F. O le ā sou iloa i le moni o le faamata'uina mai nisi o mea o tā'ua i lalo i le isi 12 masina / 10 tausaga o sosoo ai?



Alagaoa: 2022 IPSOS National Security Public Survey (Iomiga Oketopa 2022).

Manatua, o faamatalaga sese o tā'ua e aofia ai faamatalaga sese ma le faasalalau ma le mautinoa o faamatalaga sese

O le mea sili ona maitauina mai le ootoga leni o le popolega maualuga o tagata i faiga faamata'u o isi po o atunuu o tau lamalama mai (e masani ona ta'ua o "tagata faatiga loto"), e pei o le soli faagaoi (osofaiga e tagata solitulafono o tekonolosi ma atunuu o lagolagoina tagata faatiga loto e ave faagaoi, faailoa, suia, taofia pe faatama'ia faamatalaga e auala atu i le soli o faiga e puipuia ai komepiuta mo le fia maua o faamaumauga), po o soligatulafono maopoopo (gaoiga soligatulafono i tuaoi o atunuu). O faiga faamata'u lona lua o fai ma popolega maualuga i tagata i le isi 12 masina o sosoo ai o le salalau o faamatalaga sese (o faamatalaga sese o ta'ua e aofia ai faamatalaga sese ma le faasalalau ma le mautinoa o faamatalaga sese).

Ua faaalua mai le suesuega le faatuputupulaia o le popole i le vaitaimi mamao o nisi o ituaiga faiga faamata'u nei, e aofia ai le faia e se atunuu ese po o se tagata o faamalosia Niu Sila, se atunuu o faamata'uina mea o aiaina e Niu Sila i le Atumotu Pasifika ma avanoa e mafai ai ona auai Niu Sila i se feteenaiga e faaoga ai auupega malolosi.

Na matou maua foi, e auala atu i le suesuega ma faatalatalanoaga ma le mamalu o le atunuu o le mataupu, le fia maua e tagata o le tele o faamatalaga ma faatalanoa atili ituaiga faiga faamata'u nei i le malupuipuia o le atunuu.

## Taulaiga o le ootoga leni

Toe tōmanatu i manatu o matagaluega o aofia i le tau atinaega o le ootoga leni faatasi ai ma mea na maua mai le suesuega ma faatalatalanoaga ma le mamalu o le atunuu, ma o le a matou taulai i suiga ma faaletonu e patino i ai atugaluga, e aofia ai faiga faamata'u faasaga i le malupuipuia o le atunuu:

- Faasalalau ma le mautinoa o faamatalaga sese
- Soli faagaoi ma osofaiga faatekonolosi
- Soligatulafono maopoopo faavaomalo
- Alalai mai o isi atunuu ma faiga faa-agaaga
- Faiga faaterorisi ma talitonuga matuiā
- Luitau o le vave faafosisia o le malosi i atumotu Pasifika.

E avea le faasoa atu o faamatalaga nei, matou te tuuina atu ai le lagolagosua e faatupu ai le malamalama sili i le mamalu o le atunuu ma faatalatalanoaga e uiga i le malupuipuia o le atunuu.



## E afaina le malupuipua o Niu Sila i suiga o tulai mai i le atu laulau

O faiga faamata'u i le malupuipua o le atunuu e lē o se mea e ese se paneta o tupu ai. Na ioeina e tagata mea ua matou iloa e tusa ai ma le vave o fesootaiga ma le faatautavā o suiga ua iai nei faatusa i se isi lava vaitaimi, ma ua faatuputupulaia ai aafiaga leaga ona o mea o tutupu ma suiga faavaomalo i le malupuipua o Niu Sila. O isi tulaga o faamoemoe atu i ai mo le isi 10 i le 15 tausaga, o le tosina malosī o aafiaga pito tetele i le malupuipua o le atunuu mai, ma o nisi o tulaga na muai afua mai, suiga autu e fa i le atu laulau:

- **O le faatuputupulaia o faiga faatautavā** i le va o atunuu, ma le faaititia pea o 'faiga tonu faavaomalo e faavae i luga o tulafono' (o le faiga faavae aoao i le atu laulau e faavae i luga o tulafono, aga taualoa ma faalapopotoga e lagolago le galulue faatasi o atunuu, ma e uunaia ai faiga e maua ai le toafilemu, e mafai ona mate'ia ma maopoopo).

E avea le lagolagoina e Niu Sila o tau pulega faavaomalo e faavae i luga o tulafono o se tulaga tatou te manuia ai mai saofaiga toafilemu ma isi atunuu. Peitai, e iai la matou talitonuga o le a faatuputupulaia pea le faia o faiga faamata'u faasaga i tau pulega faavaomalo ona o le feteenai o manatu ma sini autu ma le faiga faavae lenei ma e tau saili auala e faaleaogāina ma lafoai ai. O faiga nei na tatou molimauina talu ai nei i le osofaiga a Russia o Ukraine. E ui i le pito aafia tele ai o Europa ma isi atunuu ma faaaauu pea ona aafia ai, o le osofaiga lenei ua solia ai tulafono faavaomalo, ma ua afaina tele ai tau pulega faavaomalo ma e afaina ai ma tagata o le atu laulau.

E tusa ma faalavelave nei mo Niu Sila lava ia, e avea le faaititia atili o tau pulega faavaomalo e faatuputupulaia ai faiga faamata'u i le malupuipua o le atunuu ma e faapena foi ona avea ma luitau sili mo i tatou e taumafai e tali atu ma puipua mea o tatou aiaina.

- **O suiga i tekonoosi** o le a aafia ai vaega uma o le soifuaga, e atiae ai faamanuiaga mai suiga ma siitia ai tulaga lelei o le soifuaga ae faapena foi ona aliae mai ai ma aafiaga fou ma luitau. E ui i le faigata ona tau mate'ia o le sa'o o suiga nei, e lē o lilo foi i manatu le faatuputupulaia o le vavalalata o fesootaiga mai tuluiga o le atu laulau ona o le vave o suiga fou i tekonoosi.
- **O suiga i le tau** e afaina ai le maua o le suavai, meaai, ma elelee e mafai ona nofoia – o tulaga nei ua aliae ai faiga faatautavā mo le utiuti o punaoa ma suiga i feoaiga a tagata. O le faateteleina o tau mata'utia ma mala faalenatura o le a afaina ai le gafatia e atunuu ona toe foi i se tulaga lelei.
- O le a faifai pea ona afaina, faalavelave ma aafia ai le tamaoaga, soifuaga ma faiga faaupufai ona o le COVID-19 ma **faamai salalau i le atu laulau** i le lumanai.

E lē gata i suiga ma aafiaga e lē mafai ona taofia, e faapena foi le suia o foliga o tagata i Niu Sila – ua tatou faasolo ina matutua ma atili eseese ituaiga tagata ma faatuputupulaia le toatele o tagata e nonofo i taulaga. E iai la matou talitonuga e moomia ona tatou tali atu i suiga nei i le faia o se suiga i auala o tatou fesootai ai ma Tagatanuu Niu Sila ina ia uunaia faiga e atili ai ona faaaofia tagata uma ma mafai ai e tagata ona auai. O se suiga e mafai ai e le malo ona atiae le faatuatuga ma tali atu i manaoga o i latou nei, ma faamautinoa o tatou malamalama uma i aafiaga, luitau ma avanoa ua fetaia'i ma i tatou. Ua valoia le tulai mai o suiga nei seia oo atu i le 2038:<sup>4</sup>

- O le a faatuputupulaia le faitau aofai o tagata i Niu Sila mai le 5.08 miliona faasolo atu i le 5.88 miliona, ma o le toatele e nofoia taulaga (71 pasene)
- o le a atili eseese tagatanuu o le atunuu, ma e faatuputupulaia lea mo tagata Pasifika, Māori ma tagatanuu Asia
- ua faasolo ina matutua tagata o le atunuu, ma o le faatusaga masani o le matua e amata mai i le 37.4 tausaga (2018) faasolo atu i le 42.2 (2038) ma le faaluaina o le aofai o tagata i luga atu o le 65 tausaga i le 1.3 miliona (2038).

## O le ā le uiga o nei aafiaga i le malupuipua o le atunuu i le lumanai?

E faamatalaina aafiaga o tulaga nei ia i tatou i le lumanai, e **manatu e tolu e lei faamaonia**. E faamatala ai se aotelega o suiga i le atu laulau ma aafiaga ona o faiga faamata'u i le malupuipua o le atunuu, ma tulaga e tatau ona tatou tali atu ai. E iai taimi e faigata ai ona tau mate'ia suiga ma mea e tutupu. O le fesuisuia'i pea o faiga faamata'u e avea lea ma tulaga e faigata ai ona iloa taunuuga e oo iai. **O le isi 15 tausaga o sosoo ai, atonu o le a tatou vaai...**

### Le faasolo pea ona tuutiitia

E tele atunuu, e aofia ai atunuu malolosi, o loo taumafai atili e uunaia mea o latou aiaina, ma le iloa e afaina ai o latou aga tausili ma mea o aiaina. O le a tele atu avanoa e ono tulai ai se feteenaiga e faaoga ai auupega malolosi i le va o atunuu ona o le faalavelave o talitonuga lotonuu e taofia maopoopoga faavaomalo. E faaititia maopoopoga i le va o faalapotopotoga tetele, ma faafaigata atili ai ona ausia luitau o afaina uma ai tuluiga o le atu laulau, e pei o suiga o le tau. O faiga faatautavā mo punaoa (malosiaga faaeletise, meaai, ma le suavai), ma suiga i feoiga a tagata, e faatupu ai avanoa e feteenai ai le va o atunuu. O le faaititia o tau pulega faavaomalo e avea ma avanoa e faatupu ai soligatulafono maopoopo, e aofia ai faiga faainitaneti, ma e iai tulaga e matilatila ai lava le alalai ma le faalavelave o lo tatou soifuaga – e aofia ai osofaiga faainitaneti ma faiga faa-agaaga. O taumafaiga a tagata faatiga loto e faalavelave i faiga faatemokarasi o avea pea ma popolega ia i tatou. O le tele o fevaevaeaiga i lo tatou atunuu e mafai ai ona aveesea le faatuatuaga i faalapotopotoga a le malo. E itiiti lava faamatalaga ua faasoaina atu i le mamalu o le atunuu e tusa ma luitau o fetaia'i ma Niu Sila, ma o le faasolo ina matutua o le faitau aofai o tagata, o le aveavea'i pea o faiga lē tutusa ma suiga i faiga faatekonolosi ua lē moomia ai tagata e faatinoa galuega, e mafai ai ona lamatia gofie nisi i talitonuga fouvale faasausili o loo salalau i luga o le initaneti ma tosina ai manatu ona o faamatalaga sese ma le faasalalau ma le mautinoa o faamatalaga sese.

### Maoa'e le tifatō

O loo faaaauu pea feteenaiga i Europa, ma o loo faatino puipuiga i Ukraine mai osofaiga, ma ua aafia atu ai ma isi atunuu ma ua atili telē ai le afaina mo se vaitaimi umi. E pei o le emo o mata le faaoga o auupega faanukelia. E lē o punitia le iai o feteenaiga i totonu o le Indo-Pacific, mo se faataitaiga, e auala atu i le faitau sese o le Taiwan Strait, ma/po o le siitia o faiga faamiliteri i totonu o le Pasifika. Ma o tua atu o tulaga nei le televavave ma le faigata ona taofiofi o faalavelave e tulai mai ona o suiga o le tau. O le mafuaaga foi lena, o loo ave pea le faamuamua e nisi o atunuu o mea o latou aiaina e ui i le afaina ai o isi, ma faiga tuusa'o faatautavā mo punaoa (malosiaga faaeletise, meaai, ma le suavai). I lo tatou lava atunuu, e vave lava le oo mai o faiga faamata'u i le malupuipua o le atunuu ma afaina ai o tatou tagata. O se osofaiga mata'utia e afaina ai faiga faatekonolosi, e afaina ai le atu laulau atoa po o le afaina sa'o ai na o Niu Sila e faaleaogā ai auaunaga faainitaneti o faalagolago i ai lo tatou soifuaga i aso uma ma e aafia ai pisinisi, auaunaga faalesoifua maloloina, ma atinae tetele tau

feoiga. O le utiuti o punaoa, ma le itiiti o faamatalaga o faasoā atu ma le salalau o faiga faatekonolosi maoa'e e uunaia ai le faia o faamatalaga sese ma le faasalalau ma le mautinoa o faamatalaga sese, o tulaga nei e faafaigata ai e tagata ona iloa le eseese o mea pepelo mai mea moni. Ua sili atu ona eseese vaega o manatu ma talitonuga o tagata i totonu o Niu Sila faatusa i se isi lava vaitaimi, ua tuuitia le faatuatuga i pulega a le malo, ma ua lamatia ai faiga e faavae i ai faiga faatemokarasi e talia ai soo se manatu, talitonuga ma tagata.

### **O se vaaiga mautinoa ma sili atu le lelei**

E ui i le tumau ai pea o le faamalosiā o faiga faavaomalo tonu, e lē o aveese ai le naunau o atunuu e tali atu i luitau o afaina ai le atu laulau e pei o suiga i le tau, ma galulue faatasi e tuuitia faiga faamata'u i le malupuipua o le atunuu, a o taofia tagata faatiga loto e tali atu i faiga sese o latou faia. O le galulue soosoo tauau faavaomalo, faiga fou faatekonolosi, ma le faafaigaluega o atinae e tali atu i suiga o le tau, o tulaga uma nei e uunaia ai le faasoā o punaoa, e fesoasoani e alofia ai feteenaiga tuusa'o ma le faaoga o auupega malolosi. E avea le manino lelei o auala o faatino ai galuega, e lē o noatia ma e maua gofie faamatalaga o faasoā atu, talatalaga ma faiga faapaaga i le va o le malo ma tagata lautele, e siitia ai le faatuatuga, talitonuga mautinoa, ma le talafeagai ona tali atu i luitau e afaina ai le malupuipua o le atunuu. E taulai galuega o faia e matātā auā le malupuipua o Niu Sila i faiga e talafeagai mo le lumanai ma e gafatia ona suia, ma tatou tutū faatasi o se atunuu e tasi e puipui ma faalauiloa mea o tatou aiaina auā le malupuipua o le atunuu ma lagolagoina le tupu olaola o tatou tagata.

## Aafiaga ma luitau o le malupuipua o le atunuu

Ua tatou oo mai i le vaega tonu lava e tataua ona tatou vaavaai lelei ai i nisi o aafiaga, faiga faamata'u ma luitau e patino i le malupuipua o le atunuu o loo fai ma popolega ia i tatou, ma o faiga o loo tu'itu'i atu pea i le suesuega ma talatalaga atoa.

- Faasalalau ma le mautinoa o faamatalaga sese
- Soli faagaoi ma osofaiga faatekonolosi
- Soligatulafono maopoopo faavaomalo
- Alalai mai o isi atunuu ma faiga faa-agaaga
- Faiga faaterorisi ma talitonuga matuiā
- Luitau o le vave faafoisia o le malosi i atumotu Pasifika.

Mo aafiaga po o luitau taitasi o le a matou faaafia ai:

- se faamatalaga e faamatalaina ai
- manatu na faaalia e auala mai i la tatou suesuega
- o auala e mafai ai ona tatou iloa suiga i le isi 10 i le 15 tausaga o sosoo ai
- o nisi o galuega o matou faatinoina e sauni ai mo le lumanai.

Ma le vaega mulimuli o le ootoga lenei, o le a folasia ai nisi o manatu e lagolagoina le malupuipua o le atunuu i le lumanai i se vaitaimi mamao, e aafia ai mafuaaga e tāua ai le faateleina o talatalaga ma Tagatanuu Niu Sila.

### O luitau mai le faasalalau ma le mautinoa o faamatalaga sese (ma faamatalaga sese)

**Faasalalau ma le mautinoa o faamatalaga sese** o le faia ma le mautinoa o faamatalaga sese po o le suia o faamatalaga ma le mautinoa ma faasoa atu ma le faamoemoe e faatupu ai lamatiaga po o se isi faamoemoe sili atu.

E sili atu ona avea ma popolega ia i matou le faasalalau ma le mautinoa o faamatalaga sese ona o le faatuputeleina ai o le afaina o le malupuipua o le atunuu. E aafia ai faiga faatemokarasi i le atu laulau atoa, ma tafieseai faatuatuaga i pulega, ma lo tatou gafatia ona tali atu pe a tofotofoina.

E eseese ituaiga faiga o faasalalau ai ma le mautinoa faamatalaga sese ma e tele ituaiga lamatiaga e tulai mai ai, mo se faaitaiga o le faalauiloa o talitonuga faasausili; e faatupu ai le vevesi o feeseeseaiga ma fevaevaeaiga i totonu o le atunuu; ma, le faasalalau o faamatalaga e ono faatupu ai le tiga ma e lamatia ai vaega o tagata toalaiti. O le tualuga o le faasalalau ma le mautinoa o faamatalaga sese e mafai ai ona aliae talitonuga faasausili ma le vevesi pe a manatu ai tagata e faatino mea ua latou talitonu i ai.

E patino lava luitau pe a patino foi i se atunuu ua afaina ona o le faasalalau ma le mautinoa o faamatalaga sese. A lagolago e isi atunuu faiga faapenei, e avea lea ma auala e atili ai le malosi ma le faatumauiina o faiga e faailoa ai ma le mautinoa faamatalaga sese, e faaoga ai punaoa tetele ma e patino i faiga faapenei e tuleia faamatalaga sese pe tafaasese i luga o le initaneti e tusa ma manatu po o mataupu e tāua i Tagatanuu Niu Sila.

Mo se faaitaiga, na ta'ua i se lipoti mai suesuega auiliili a le Microsoft le noatia o Tagatanuu Niu Sila i faamatalaga sese ua fai ma le mautinoa e maua mai Russia po o talitonuga faaituau i luga o le initaneti i le mavae ai o Tesema 2021, ma o le tele o

faamatalaga nei e fesootai i le COVID-19.<sup>5</sup> Na afua ai le mau solo tetee faasaga i faiga e tali atu ai i le COVID-19 ma isi mataupu i totonu o Niu Sila.

A faatusa i isi atunuu, e maualuga atu le faatuatuaga i Niu Sila o ofisa faasalalau a le malo ma faalapopotoga a le malo. E iai le popolega ia i matou i le faaleaga o le faatuatuaga ma le faaleaogāina o le malupuipua o le atunuu ona o le faasalalau ma le mautinoa o faamatalaga sese. E mafai foi mai le faasalalauina ma le mautinoa o faamatalaga sese ona afaina ai le felagolagomai o tagata (o tulaga e lagona ai e tagata uma le saogalemu, faatāuina ma le amanaiaina, ma le lagona talisapaia ma le mafai ona auai atoa i mea faitele).

O le aunoa ma mea e noatia ai ma le sopoia o tuluiga uma o le lalolagi i faiga faainitaneti ua mafai ai ona faasoa faamatalaga ma fesootaiga a tagata mai lea itu o le atu laulau i le isi. Ae ui foi i le aogā ma le tāua o le initaneti, o se faiga malosī foi e faasalalau ai faamatalaga e faafoliga o ni faamatalaga moni toe faatuatuaina ae leai. A faasoa atu faamatalaga sese nei e se tasi ma le manatu o ni faamatalaga moni, e ta'ua lea o **faamatalaga sese** – faamatalaga e lē moni pe taufaasese, ma e lē o faia i se agaga po o le faasoa ma le faamoemoe e faatupu ai lamatiaga. O auala nei, ua faaauau pea le salalau o faamatalaga e lē moni ma le taufaasese, aemaise lava i fesootaiga televavave – ma e ui i faiga ua faia e nisi o kamupani tau fesootaiga televavave e taofia ai faaletonu faapenei, e tumau pea le iai o luitau nei, ma o le taumafai ia paleni le faatuatuaina o faamatalaga ma le saolotoga e faaali ai manatu ua faafaigata tele ai taumafaiga e tali atu ai.

***“O se faafitauli lea na vaaia i tausaga e tele ua mavae atu nei. Talu ai le siitia o faiga faainitaneti ma fesootaiga televavave, ua sili atu le mafai ona maua e tagata o faamatalaga, e ui lava e lē moni, ae o faamatalaga o lagolagoina ai o latou talitonuga.”*** Manatu faaalua sui auai o le suesuega

O le salalau ma le mautinoa o faamatalaga sese ma faamatalaga sese e aafia ai lo tatou gafatia ona tali atu i luitau e pei o le COVID-19, e faavae i le tutusa o le malamalama i faamaoniga ua maua. E iai le popolega ia i matou i le tumau ai pea o lea luitau ma le vave saoasaoa i le lumanai.

Mai le National Security Public Survey na faia talu ai, na maua mai ai manatu i itu nei:

- e tulaga muamua i le lisi o faiga faamata'u i le malupuipua o le atunuu faamatalaga sese (e ta'ua 'faamatalaga sese' e aofia ai faamatalaga sese ma le faasalalau ma le mautinoa o faamatalaga sese)
- o le 84 pasene o tagata na tali mai i le suesuega na faailoa lo latou talitonuga i le moni o lamatiaga ona o faamatalaga sese i mataupu e tāua i tagata lautele i Niu Sila i le isi 12 masina o sosoo ai
- o le 25 pasene na ta'ua e sili atu nai lo se isi lava mea le avea ai o faamatalaga sese ma lamatiaga ia i latou ma o latou aiga
- e iai le manatu o le lamatia o i latou ona o faamatalaga sese i le taimi nei ma le isi 10 tausaga.

O le tele o faamatalaga sese o faasalalauina ma le mautinoa e lē o solia ai se tulafono ma e faamalieina ai faamatalaga o faaupuina ai le puipua o manatu – ma ua faafaigata ai po o le lē talafeagai ona faia o se tali atu e faaoga ai metotia tuai e faamalosi ai le tulafono ma metotia faa-atamai a o lei aliali ifo ni lamatiaga. E moomia le galulue faatasi o le malo, tagata ma tomā suesue, ma kamupani tekonolosi ma ofisa faasalalau, e taofia le faasalalau i luga o

le initaneti o feau e lamatia ai, a o puipuia foi i le saolotoga o tagata e faaali o latou manatu ma le leai o ni noataga e faaoga ai le initaneti.

O nisi o tagata i Niu Sila, ua loa tausaga ma augatupulaga o fetaia'i pea ma faiga lē tutusa, o le tuulafoaiina po o le faailoga tagata (e aofia ai le faailoga lanu) ma le leai o se faatuatuaga i le malo ma ofisa faasalalau. Ma o manatu nei, e faigofie ai lava ona faia ma le mautinoa o le faasalalau o faamatalaga sese, aemaise i tagata faatiga loto ma isi atunuu o tau saili se fevaevaeaiga i lo tatou atunuu ma uunaia feeseeseaiga i le va o tagata eseese.

### **Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:**

- o le siitia o le saosaoa ma le maoa'e o le faasalalau ma le mautinoa o faamatalaga sese. E iai isi atunuu o loo taumafai ma le mautinoa e faatupu le vevesi, aveese le faatuatuaga ma faatupu ai se fevaevaeaiga o Tagatanuu Niu Sila. O se tulaga e faatumauiina ai faiga faamata'u ia tatou faiga faatemokarasi ma le malupuipuia o le atunuu
- o tekonoosi fou ma ituaiga ua fougou mai e ono siitia ai faafitauli e afua mai le faasalalau ma le mautinoa o faamatalaga sese, e aofia ai ituaiga faasalalau e otomeki ona faagaioia e faiga faatekonosi e pei o mea e ta'ua o 'deepfakes' faapea ai ma le faaoga o masini ma tekonoosi faa-atamai
- siitia ai lamatiaga ma taunuuga e afua mai i le faasalalau ma le mautinoa o faamatalaga sese e atili ai ona fevaevaea'i tagata ma aafia ai tagata (mo se faataitaiga, o le tau faamata'u, sauaga, faamata'u ma le faasoesā i pulega tau tulafono, ofisa faasalalau, tomai sutesue, sui tofia, ma le mamalu o le atunuu)
- o le faasalalauina ma le mautinoa o faamatalaga sese e tosina ma faateleina ai le tele o aafiaga ma luitau i le malupuipuia o le atunuu.

### **Sauniuni nei mo le lumanai:**

- **Galulue sosoo tauau** – e moomia taumafaiga sili atu le malosi e mafai ai ona iloa faiga o faalauiloa ai le faasalalau ma le mautinoa o faamatalaga sese ma fesootaiga o lagolagoina faiga nei, ma faalavelave i ai i se faiga faavaomalo maopoopo, faatasi ai ma le faasa'o o i latou o lagolagoina nei ituaiga faiga. E tatau ona aofia i taumafaiga nei le galulue faatasi ma le toatele o tagata eseese, ofisa faasalalau, tomai sutesue, matagaluega a le malo ma faalapopotoga tumaoti – aemaise ituaiga faiga tau fesootaiga televavave – ina ia malamalama i aafiaga o faiga faamatematika o latou faaogaina e faatosina atu ai tagata i mea o faasalalau i luga o le initaneti. E tumau pea le avea ai o le faasoa o faamatalaga aogā ma isi atunuu o se vaega o taumafaiga e tali atu ai.
- O faiga ua faia i Niu Sila e atiae ai le vave faafoisia o le malosi o le atunuu ma taofia le faasalalau ma le mautinoa o faamatalaga sese o tulaga nei e moomia ona anoa ma umi se taimi e aogā ai. E tatau ona faatasia uma ai tagata e maua ai le tele o metotia ma le tomaj, a o tumau i le puipui o aiatatau faaletagata ma le saolotoga e faaali manatu, ma le leai o ni noataga, saolotoga ma le malupuipuia o le initaneti.

## Soli faagaoi ma osofaiga faatekonolosi

O le soli faagaoi ma osofaiga faainitaneti e faavae i luga o le sailia o tupe, ma o ni uiga faafitafita po o le faa-agaaga, po o le naunau foi e faalauiloa se lagona po o se talitonuga. E tele ai tupe gau, ta'uleagaina ai, ave faagaoi o meatotino ma le faalavelavea o auunaga tetele e pei o faletupe ma auunaga faalesoifua maloloina.

O osofaiga faainitaneti o se faaletonu o afaina ai tuluiga uma o le atu laulau ma e aafia ai malo uma, auā e mafai ona faalavelavea ai auunaga tetele ma e afaina ai le soifua ma le ola o le tagata. E faalagolago le gafatia ona tatou tali atu i osofaiga faainitaneti i le faamaopoopo mai o isi atunuu e tau faailoa vaifōfō ma talia faatasi uiga ma faiga e 'tonu ma tatau' ai.

### E taatele osofaiga faainitaneti i Niu Sila

O osofaiga faainitaneti maoa'e na osofaia ai pisinisi tetele na aofia ai:

- se osofaiga o le NZX (New Zealand's stock exchange) na matuai lofituina ai le faalapotopotoga i feoaiga faainitaneti e tau taofia tagata mai le taumafai ia maua auunaga o fesootai i luga o le initaneti
- solia o faiga o teu ai faamaumauga a le Reserve Bank of New Zealand ona ua afaina le IT o teu malupuipua ai faamaumauga
- e \$30 miliona le telē o le soli faagaoi o le initaneti na osofaia ai feuaiga o le cryptocurrency a le Cryptopia e faafoe mai Kalaiasetete, ma
- le togiola o osofaiga na maua ai faamaumauga a le Waikato District Health Board.

E iai lo matou talitonuga o le isi 10 i le 15 tausaga o sosoo ai, o le a faatuputupulaia osofaiga ogaoga ma le maoa'e faainitaneti. E aafia leaga ai Niu Sila i osofaiga faainitaneti o tutupu i atunuu mamao. I totonu lava o Niu Sila, e 81 pasene o tali mai tagata na auai i le National Security Public Survey na faaalua le avea ai o osofaiga faainitaneti ma popolega – o se taunuuga e maualuga atu mai le faatusaga masani i le atu laulau (75 pasene). Na ioeina lea manatu e i latou na tali mai i le mataupu na faatalanoaina, na latou ta'ua ai e lē masani ona maua e tagata taitoatasi mea e faatumauina ai le saogalemu i luga o le initaneti.

***“O se tulaga lea o loo vaai i taimi uma. Ma o la'u galuega le mulimulita i le MAU tulafono e taumafai ai e taofia osofaiga nei, ma e itiiti lava se aogā e maua mai ai.”***  
**Manatu faaalua sui auai o le suesuega**

E toatele tagata na faailoa mai ia i matou le moomia o le tuu atoa o taumafaiga tutusa e malupuipua ai faiga i luga o le initaneti e pei ona faia i le itu faaletino, aemaise mo vaega e itiiti le iloa o faiga faainitaneti ma i latou e lamatia gofie ona o isi mafuaaga.

O le faasolo mai i le 2020/21, na faamauina ai e le [National Cyber Security Centre](#) (NCSC), o se vaega o le Government Communications Security Bureau, le 404 o osofaiga i faalapotopotoga tetele o le atunuu – ma e 15 pasene e maualuga atu ai faatusa i le tausaga i ona tua atu. Mai mea na tutupu, e 27 pasene le telē o faailoga o soligatulafono na masalomia po o tagata na su'e ai a latou tupe (e faatusa i le 14 pasene o le tausaga ua te'a). Na faia e le NCSC se faatusatusaga e fua i ai taumafaiga na latou taofia ai le \$199 miliona o le tau o lamatiaga.<sup>6</sup> O lipoti na saunia e le [CERT NZ](#) o faailoa ai mo tagata taitoatasi ma isi pisinisi e tusa ma le 13 pasene i le 2021 na siitia ai tulaga faapenei na tutupu ma e \$16.8 miliona na faaoga ai.<sup>7</sup>

O manatu na tuuina mai i le mataupu na faatalanoaina na faasino i le sese o le faatusatusaga i le va o le siitia o faiga faamata'u mai osofaiga faainitaneti ma atinae o faafaigaluega e faalapotopotoga i le malupuipua o le initaneti, ma le feteenai o manatu i le vaega tonu e gafa ma le malupuipua o le initaneti. E lē o maua i le Malo metotia e tausia ai le malupuipua o Niu Sila. E moomia e pisinisi ma tagata taitoatasi ona nofouta i le aogā o puipuga ma ia mataala ia latou lava puipuga e tetee atu ai i osofaiga faainitaneti.

### **Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:**

- o le faatuputupulaia o le lavelave ma le faifai soo o soligatulafono faainitaneti o luitauina ai lo tatou gafatia faatasi ona tali atu
- o le faateteleina o osofaiga faainitaneti o lamalama ai tekonoosi aogā mo pisinisi, e aofia ai maketi e gaosia oloa
- o tekonoosi foufou ma le fesuisuia'i o le faaaogaina o tekonoosi nei e avea ai ma auala fou e faatautaia ai osofaiga faainitaneti ma soligatulafono e uunaia i faiga faainitaneti
- o le faatoateleina o atunuu e lagolagoina faiga faainitaneti, ma le nenefu po o ai tonu le atunuu a o ai tagata faatiga lotu tutoatasi ma le maualuga o lo latou tomai
- o le siitia o faiga o faia ai feaatauaiga faapouliuli mo le faatauina mai ma le faatauina atu o polokalame faakomepiuta leaga ma faamatalaga, ma ua mafai ai ona faia osofaiga faainitaneti i totonu o le li'o o tagata e lē patino i ai ni tomai faapitoa
- o le siitia o le faaaogaina o cryptocurrencies e auala atu i faiga faavae e lē malosi o faatonutonu ai feuaiga faananā o tupe o se vaega o osofaiga faainitaneti, ma le
- siitia o le faaaoga o osofaiga faainitaneti e lagolago ai isi gaoiga e aafia ai le malupuipua o le atunuu e pei o le faasalalau ma le mautinoa o faamatalaga sese ma faamatalaga sese, o le alalai mai o atunuu ese ma soligatulafono maopoopo i le va o atunuu.

### **Sauniuni nei mo le lumanai:**

- **Galulue soosoo tauau** – [New Zealand's Cyber Security Strategy 2019](#) o saunia ai se auivi o galulega faatino e taimua ai le malo, ma e galulue faapaaga ai ma matātā tumaoti. E lagolagoina e le NCSC faalapotopotoga tetele o le atunuu e puipua upega fesootai, ma galulue e saunia fautuaga e taofiofi, ma poloka ai, faailoa, ma faalavelave, i gaoiga faainitaneti leaga e ono aafia ai le malupuipua o le atunuu po o le manuia o le tamaoaiga. O le avea ai o osofaiga faainitaneti o se vaega o soligatulafono maopoopo ma e faaautu tonu lava i le sailia o tupe, o le auga tonu lena o loo taulimaina e le Transnational Organised Crime Strategy faasaga i faalapotopotoga o solia tulafono ma le feaveai faananā o tupe o loo faalagolago i ai le maua o tupe mama e lē tusa ai ma le tulafono, e aofia ai tagata o osofaia le initaneti.
- **Faamatalaga lautele ma talatalaga** – o le NCSC, CERT NZ, NZ Police, ma le Netsafe e maua ma faasalalau mai ai lipoti ma fautuaga.
- **Talatalaga faavaomalo** – e aofia ai le tuuina atu o le pule malosi i le '[Budapest Convention](#)' on Cybercrime, ma le faamoemoe e faamalosi atili faamaopoopoga faavaomalo e tali atu i soligatulafono faainitaneti, ma talatalaga mai paaga vavalalata o le Malo Afaatasi ma isi ina ia poloka ma faalavelave gaoiga leaga faainitaneti. E iloa ai e masani ona fesootai faiga faamata'u faainitaneti i faaletonu i le tuaoi o atunuu ma e



moomia ai vaifōfō faavaomalo. E galulue vavalalata foi le NCSC ma paaga faavaomalo e atiae se puipuiga mauaa o faiga faainitaneti.

- **E galulue pulega o faamalosia tulafono ma faamaopopo faamatalaga** – ma paaga faavaomalo, e aofia ai le faasoa o faamatalaga ma le tomai e taofia ai osofaiga faainitaneti i isi atunuu. O loo sailia foi e leoleo avanoa e galulue faapaaga ai ma pulega o faamalosia tulafono i atunuu mamao e aveese mai aseta mai tagata o faia soligatulafono faainitaneti.

## Soligatulafono maopopo faavaomalo

O soligatulafono maopopo i le va o atunuu o se faafitauli ua soo ai le atu laulau ma e faaleaogāina ai le soifua manuia o tagata, pulega, atinae tau tamaoaiga ma le malupuipua o le atunuu. I se vaaiga aoao i le atu laulau atoa, o tupe maua mai soligatulafono maopopo e tusa lea ma le USD\$3 tiliona (pe faatusa foi i le 4% o le GDP o le lalolagi atoa).<sup>8</sup>

E auala atu i gaioiga e solia ai le tulafono, le sailia e tagata solitulafono o soligatulafono maopopo i le va o atunuu e maua ai le pule, faiga faatosina ma tupe e auala atu i le feaveai faananā o fualaa faasāina, o le soona faileaga o tagata fai mai ma le feaveai faananā o tagata, faiga taufaasese ma le piopio, ma soligatulafono faainitaneti. E faatautaia i totonu o lo tatou atunuu ma tau auala atu i Niu Sila, ma e afaina ai tagata ma pisinisi, ma aafia ai le faatuatuaina e tagata o tatou faalapotopotoga ma tulaga tauleleia i le lalolagi.

***“Na faasalalau i talafou faatuatuaina i tausaga ua te’a osofaiga tetele na maua ai fualaa faasāina, auupega malolosi faasāina i le tulafono ma isi. O se faailoga mautinoa o loo ola ma sasao soligatulafono maopopo o aofia ai tagata faavaomalo faapea ai ma Niu Sila i le taimi nei, ma e lē tau mate le toe aliae o tulaga faapenei i le isi 12 masina o sosoo ai.” Manatu faalia sui auai o le suesuega***

E iai lo matou talitonuga o loo uunaia soligatulafono maopopo mai le siitia o sootaga maoa’e ma le maopopo ma le sasao o faiga nei i le va o atunuu. E tau auala atu fesootaiga i faiga faavae i le tuaoi ma fefaatauaiga, tupe, kamupani e umia aseta ma kamupani tausi mavaega o faafaigofie ai ona feaveai faananā tupe, ma manaoga ma le gaosia o oloa ma auaunaga e lē tusa ai ma le tulafono i le va o atunuu, e ono tupu ma ola ai soligatulafono maopopo i le va o atunuu mai totonu o lo tatou lava atunuu.

E mafai ai ona aafia le faatuatuga ma le talitonuga mautinoa o Tagatanuu Niu Sila i tatou pulega lautele ma faiga faavae e tali atu ai. Na ta’ua e le valusefulu pasene o tagata na tali mai i le National Security Public Survey le moni o faiga faamata’u mai soligatulafono maopopo i le isi 12 masina o sosoo ai, ma le 78 pasene na ta’ua le faaaauu pea o faiga faamata’u mo le isi 10 tausaga o sosoo ai.

E pulea e vaega o faia soligatulafono maopopo i le va o atunuu taitai o faaaoga mailei ma faiga faamata’u e pulea ai soligatulafono latou te pulea ma puipuia ai fefaatauaiga soligatulafono. E iai le manatu e talafeagai sauaga e pulea ai faiga nei. O le faia o sauaga e auala atu i le totogi o auaunaga e pei o le faaaoga o tagata ua atamamai i soligatulafono ma/po o le faia faatasi ai ma fualaa faasāina ma ua tatou vaaia ai sauaga i le tino, auupega malolosi o se auala e lagolagoina le puleaina o gaioiga soligatulafono. O le tele o manatu na faalia mai e le mamalu o le atunuu i le mataupu o loo faamamafa ai aafiaga lautele o soligatulafono maopopo i le va o atunuu, ma atugaluga autu i sauaga e fesootai ma vaega fai kegi ma le tufa o fualaa faasāina i totonu o lotoifale.

### Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- siitia o le soona fai o fefaatauaiga e lē tusa ai ma le tulafono i soo se auala e maua ai tupe mama – mai fualaau faasāina, auupega malolosi e faasāina i le tulafono, soligatulafono faainitaneti ma metotia tau tekonolosi fofou, meaola faalafuā ma punaoa faalenatura, feoaiga ma galuega e lē tusa ai ma le tulafono, o le aumai atunuu mamao o oloa i auala e solia ai le tulafono, faiga taufaasese maopoopo ma faiga faapiopio. E iai lo matou talitonuga o le a taumafai vaega o faia soligatulafono maopoopo i le va o atunuu e faafetaui ma suia a latou metotia e maua ai tupe mai le faaleagaina e isi
- siitia o soligatulafono e maua ai fualaau faasāina aemaise le afaina ai o tagata e lē tagolima i Niu Sila, talu ai o loo lamalama e faalapotopotoga o solia tulafono tagata na afaina i soligatulafono ae o i latou foi e maua atu ai tagata e ave ma vaega o solia tulafono i le va o atunuu<sup>9</sup>
- siitia o faiga maoa'e i le feaveai faananā o tupe, e aofia ai kamupani e pulea aseta ma kamupani tausi mavaega i le lalolagi atoa, ma le tau auala atu i tinoitupe ma cryptocurrencies. O le leai o tulafono o faatonutonu ai fefaatauaiga o tinoitupe i Niu Sila o le isi lea auala o sasao ai le feaveai faananā o tupe. E vave lava ona latou faaoga tulaga o loo misi i le tulafono. E sao tupe maua mai soligatulafono i faiga faapisinisi, fale ma oloa anagatā, ma e afaina tele ai tagata o fia faatauina mai fale ma faafoeina pisinisi
- o le faatupu vevesi o soligatulafono maopoopo i faiga o puleaina ai tuaoi o Niu Sila
- o le siitia o taumafaiga a vaega o faia soligatulafono maopoopo i le va o atunuu e tosina, ma sao atu ai i totonu, faaleaga po o le faamailei o tagata taitoatasi ma auaunaga lautele e faalauaitelina ai gaoiga soligatulafono ma gaoiga e faamata'uina ai le malupuipua o le atunuu. O faiga nei e afaina ai le faatuatuaga ma le talitonuga mautinoa o tagata lautele ia tatou faalapotopotoga ma le tauleleia o Niu Sila o se atunuu e itiiti faiga faapiopio o maua ai ma le maualalo o aafiaga i lona tulaga faapaaga tau fefaatauaiga ma isi atunuu.

### O nisi o galuega o matou faatinoina i le taimi nei

- **Feaveai faananā o tupe ma le aveese mai o aseta** – o le faasoa o faamatalaga aogā, galulue ma paaga mai isi atunuu e taofia, poloka, ma faalavelave i soligatulafono maopoopo.
- **Paaga ma isi matagaluega, ma isi atunuu e taofia faiga faamata'u o faia i isi atunuu** – galulue ma atunuu i fafo, e aofia ai le faasoa o faamatalaga ma faamatalaga aogā, e taofia faiga faamata'u, aemaise fualaau faasāina ma tagata solitulafono ona ulufale mai i Niu Sila.
- **Faamalosia o le tulafono** – matagaluega o le latou lea matafaioi e tali atu i soligatulafono maopoopo e aofia ai le polokalame na faatulafonoina e le Kapeneta o le Resilience to Organised Crime in Communities ma le Transnational Organised Crime Strategy.

## Alalai mai o isi atunuu ma faiga faa-agaaga

Ua avea ma e faaauau pea ona avea Niu Sila ma atunuu e lamalama ma alalai mai ai isi atunuu ma faiga faa-agaaga. E aofia ai taumafaiga a isi atunuu ina ia, mo se faataitaiga:

- taumafai e maua faamatalaga maaleale, tekonoosi po o meatotino puletaofia (e pei o mea e pule i ai tatou pisinisi, iunivesite ma matātā tau aoaoga)
- faaaga osofaiga faainitaneti e ave faagaai ai faamatalaga pe lamalama ai atinae tetele
- maitau, pulea po o le faamata’u o tatou tagata, aemaise i latou e iai fesootaiga i atunuu mamao, ma afaina ai o latou aiatatau ma le saolotoga i Niu Sila
- punitia po o le faasalalau o faamatalaga (e aofia ai ma fesootaiga televavave) o atagia ai mea o latou aiaina, e aofia ai le faasalalau ma le mautinoa o faamatalaga sese.
- faatosina atu sui na tofia e tagata, vaega faaupufai, ma faiga palota, ma
- faamata’u pe taumafai e faamalosia le pule aoao i Niu Sila po o le saolotoga e faia ai nisi o faaiuga (mo se faataitaiga, faamata’u e faasā ona aumai i le atunuu po o le faatauina atu o oloa i le va o atunuu pe a faapea e faatino se faiga e lē o mananao i ai).

O loo faatuputupulaia o le alalai mai o atunuu ese i isi atunuu, e pei ona vaaia i le atu laulau atoa, ma e lē o saofia mai ai Niu Sila – o loo matou vaaia le tele o faataitaiga i le itu lea.

Mai le lautele o le atunuu na tuuina mai manatu i le mataupu o faatalanoaina:

- e toatele lava na ta’ua le avea ai o le alalai mai o isi atunuu o se faiga e faamata’u ai mea e patino i le tagata ma le atunuu aoao
- na faaalua se popolega o nisi o loo tau saili e nisi o atunuu se fevaevaeaiga o ituaiga tagatanuu eseese i Niu Sila (o le taumafai lea e aveese le malosia o le pulega tonu faavaomalo)
- o luga teisi atu o le vaetolu o manatu na ta’ua ai Saina, ma lo latou alalai mai i tagata o nonofo i Niu Sila ma tulaga e ono faatosina ai faiga faaupufai, ofisa faasalalau ma pisinisi i Niu Sila, ma
- o nisi na ta’ua se popolega i le moomia e Niu Sila le faatele o isi ituaiga maketi tau fefaatauaiga e alofia ai le faamalosia o le tamaoaga i le lumanai.

### **Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:**

- ua avea tekonoosi televavave fougou ua suia ai faiga ma auala o tau saili ai isi atunuu e faatosina Niu Sila (ma ona atunuu tuoai) ma ua atili faafaigata ai mo i tatou ona taofia le tupu ai o tulaga faapenei
- ua faateteleina faiga faatautavā i le va o atunuu ma ua ‘nunumi’ faatasi ai feteenaiga ma le filemu (e aofia ai faiga o alalai mai ai isi atunuu). O le a telē atu se aafiaga o faiga faafitafita ma faiga faamalosia. O nisi atunuu o le a taumafai e faananā auala e faatino ai mea o faamoemoe i ai, a o taumafai e tutūmamao e alo ese pe tau faaititia le fetuu e isi atunuu.

### Sauniuni nei mo le lumanai:

- **Talatalaga Lautele** – faateleina le siitia o le malamalama ma le gafatia e faalapotopotoga ona tali atu i aafiaga ona o le alalai mai o isi atunuu. O loo galulue le [malo](#) faatasi ma faalapotopotoga tau suesuega ia latou pulea aafiaga e fesootai ma tekonoosi e faigofie ona maua e isi, ma saunia taiala mo sui tofia ma isi matātā o fetaia’i ma nisi o aafiaga.
- **Faasoaina atu o faamatalaga ma metotia** – o loo matou faalauiloa faiga manino e iloa ai mea o aiaina e isi atunuu ma faaoga le [New Zealand’s Protective Security Requirements](#) e saunia ai se auivi e mafai e faalapotopotoga ona faaoga e iloilo ma faamalosi atili ai faiga o faatulaga i ai le malupuipua o i latou.
- **Tulafono** – o loo matou faamautinoaina o loo faia i Niu Sila taiala faavae ma tulafono e agatonu ma talafeagai ma mea o tutupu ina ia mafai ona faaititia pe taofia le alalai mai o isi atunuu ma faiga faa-agaaga. E aofia ai le Overseas Investment Act 2005, o le Telecommunications (Interception Capability and Security) Act 2013, ma le auivi o puleaina feafaatauaiga o oloa i atunuu mamao ma tatou tulafono i le faatupega o faiga palota.

### Faiga faaterorisi ma talitonuga matuiā

Na faamamafa i tali na faaalua e sui auai o le National Security Public Survey se popolega o tagata i suiga i faiga faaterorisi ma talitonuga matuiā i Niu Sila ma o le a atili faigata ona taofia i le lumanai. E iai le talitonuga i le valusefulu pasene o sui na auai i le suesuega i le moni o faiga faamata’u o se osofaiga faaterorisi po o sauaga matuiā i Niu Sila i le isi 10 tausaga o sosoo ai, ma le 23 pasene o talitonu i le avea ai o faiga faaterorisi ma faiga faamata’u silisili faasaga i o latou tagata.

I tuluiga uma o le atu laulau, o loo suia faiga o faatupu ai talitonuga matuiā, ma e faasufi i le malosi ma le lavelave o talitonuga (manatu) ma e faaauau pea ona faamata’uina tagata taitoatasi i faiga faaterorisi e afaina ai lo latou saogalemu ma le lotogatasi. O mea o faaosoosoina ai talitonuga matuiā e aofia ai manatu e fevaevae’i ai se atunuu (ua matuai eseese manatu po o talitonuga), ua aliae ai se feeseeseaiga i le va o vaega faaupufai ma totonu lava o vaega faaupufai, ekalesia ma ituaiga tagatanuu, ma faiga faamata’u e moni ma ua talitonu e afaina ai nisi o ituaiga tagatanuu, aga tausili, pulega ma tulaga faaletagata.

E avea pea le initaneti ma auala o soona fai e tagata o faia talitonuga matuiā – ma ua faateteleina a latou faiga ona e lē o iloa tonu i latou nei i luga o le initaneti, o le faigofie ona faaoga, o le puipua o faamatalaga patino ia i latou i faailoga ese e punitia ai, ma o se luitau lea mo malo, kamupani ma tagata lautele ia vave ona iloa suiga ua iai tekonoosi. E faaoga e tagata o faia talitonuga matuiā le initaneti e faasufi atu ai tagata e faatino a latou gaioiga, faasoa ai le iloa, ma fuafua ma faasalalau ai osofaiga i luga o le initaneti, ma ua avea o latou manatu faasausili ua tele ai isi talitonuga ua aliae mai e aunoa pe itiiti foi se lapataiga e iloa ai.

[Ko tō tātou kāinga tēnei](#) – o le lipoti na saunia mai le Royal Commission of Inquiry i le osofaiga i le malumalu muselemi i Kalaiasetete – o faamamafa ai luitau o galuega e mataituina ma faafetaui ai manatu faasausili i luga o le initaneti, ma ua toe faamaonia ai le moomia o matagaluega e maua ai tomā faapitoa ma puipua o i ai le tofā loloto, metotia ma punaoa e lagolagoina galuega e faafetaui ai faiga faaterorisi. O le telē o nei taumafaiga e faalagolago i le sa’o o faamatalaga o maua i le taimi tonu o moomia ai.

## Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- o le faateteleina o le salalau o manatu faatupu inoino ma le lē faautauta i luga o le initaneti, aemaise faamatalaga faatupu inoino ma le faaaoga o mea e faali ai manatu faasausili, ma o mea nei e faaosofia ai le faateteleina o faiga faamata’u o faiga faaterorisi ma talitonuga matuiā
- faateteleina o talitonuga faasausili i tuluiga o le atu laulau, ma ua aliae ai ma nisi o manatu na fafau mai manatu faasausili nei.

## Sauniuni nei mo le lumanai:

O le sini autu o le [New Zealand’s Countering Terrorism and Violent Extremism Strategy](#) o le faamaopoopo o la tatou atunuu e puipui i Tagatanuu Niu Sila mai faiga faaterorisi ma ituaiga talitonuga matuiā uma. E fa poutu autu o le taiala faataatia lenei, ma e faatasi ai ma galuega e aofia ai:

- **Mōhio, malamalama** – faavaeina le [He Whenua Taurikura](#), o le National Centre of Research Excellence for Preventing and Countering Violent Extremism. O le pulega tutotonu lea e saunia suesuega Tumaoti, e patino ia Niu Sila e iloa ai mafuaaga, ma faiga e fua i ai le aogā o galuega e taofia, faiga faaterorisi ma talitonuga matuiā.
- **Mahi tahi, galulue faatasi** – o le fonotaga faaletausaga He Whenua Taurikura i le taofiaina ma le faafetaui o talitonuga matuiā ma e saunia ai se vaaiga autu mo le galulue faatasi o se atunuu e tasi e tuuititia lamatiaga. O Niu Sila, faatasi ai ma Farani, o loo taimua i le faatinoga i le atu laulau o le Christchurch Call to Action e faatama’ia ai faiga faaterorisi ma talitonuga matuiā o faasalalau i luga o le initaneti. E galulue foi matagaluega ma paaga faavaomalo e fai se sao i galuega o faia i le atu laulau e faafetaui ai taumafaiga faaterorisi.
- **Whakahōtaetae, taofia** – o loo faia galuega e atiae ai se [Auivi o Taiala Faataatia mo le taofiaina ma le faafetoai o talitonuga matuiā ma manatu faasausili i Aotearoa Niu Sila](#). O loo faia nei galuega e taofia ai ma e aofia ai le He Aranga Ake, e tele matagaluega o aafia ai e faatino se polokalame e vave ona taofia ai faiga nei ma e galulue faatasi ma lagolagoina tagata taitoatasi o faaali uiga e faatupu ai le popole.
- **Takatū, sauni e vave tali atu ma toe faalelei** – o loo matou galulue faapaaga e lagolago tagata ua afaina i osofaiga, faapea ai ma le faamautinoa o agatonu ma talafeagai tulafono e faafetoai ai faiga faaterorisi, auupega malolosi, feaveai faananā o tupe ma faafetoai ai le faatupega o faiga faaterorisi.

## Luitau o le vave faafoisia o le malosi i atumotu Pasifika

O le taatiaga o la tatou laufanua i le atu laulau, o le vavalalata o sootaga o tagata, ma le tuufaatasia o tatou faiga faavae (e pei o tausiga faalesoifua maloloina), o lona uiga e lē mafai ona lē afaina Niu Sila i mea o tutupu i Atumotu o le Pasifika. O le toafilemu, mautū, lauusi ma le vave faafoisia o le malosi i le Pasifika o vaega nei e tāua i le malupuipua o Niu Sila. Ae o loo fetai’i le itulagi o tatou iai ma le tele o luitau e fesootai ma e afaina tele ai le malupuipua o le atunuu.

E tumau pea le avea o suiga o le tau ma faiga faamata’u silisili i le soifuaga, puipuiga ma le soifua manuia o tagata Pasifika, ma le faateteleina o aafia o le siisii o le gataifale, o le matautia o tau, o le utiuti o suavai faalenatura e aogā i le taumafa ma le faatuputupulaia o

le moomia o meaai. O se faaletonu o feagai ai nei ma nisi o atumotu o le Pasifika, ma e avea foi suiga o le tau e atili faateteleina ai luitau tau agafesootai, tamaoaiga ma puipuiga.

E avea pea faiga faamata'u i tuaoi o atunuu e tofotofoina le vave faafoisia o le malosi o tagata Pasifika, e aofia ai ae e lē faatapulaaina i ai: soligatulafono maopoopo i le va o atunuu; soligatulafono tau le siosiomaga e pei o le solia o tulafono i le tātūuina o laau, o le faaleagaina o gataifale ma faiga faiva o solia ai tulafono, e lē o lipotia ma e lē o faatonutonuina; o faiga faamata'u e afaina ai le ola ma le soifua o tagata e pei o faamai e pepesi gofie ma manu faalafuā; ma faiga fou e pei o soligatulafono faainitaneti, alalai mai o isi atunuu ma le faasalalau ma le mautinoa o faamatalaga sese ma faamatalaga sese.

O sui na auai i le National Security Public Survey na latou faaalia foi le mou ese o le malosi o Niu Sila i le Pasifika, ma e iai lo latou talitonuga o le a faateteleina le avea ai o le tulaga lea ma luitau i le isi 10 i le 15 tausaga o sosoo ai:

- e 57 pasene na latou ta'ua le moni o faiga faamata'u i isi atunuu (fafo atu o le Pasifika) ua lamatia ai le aiaina e Niu Sila o mataupu i totonu o le Pasifika i le isi 12 masina o sosoo ai
- e 61 pasene e talitonu le avea o faiga faamata'u mai isi atunuu i totonu o le Pasifika o se tulaga o fai ma popolega i le isi 10 tausaga o sosoo ai. E sili atu ona taatele manatu nei i tagata Asia ma tagata Pasifika na tali mai i le suesuega.

O loo tatou vaaia le faateteleina o faiga faatautavā i totonu o le Pasifika, ma e mafua tele i le faatuputupulaia o le malosi o Saina. O faiga faatautavā nei o le a vaaia i le lumanai ma o le a faateteleina ona afaina ai le malupuipua ma le pule aoao tutoatasi o lo tatou itulagi ma atumotu o le Pasifika. E ui i le aogā na maua mai mo Niu Sila i faiga o malupuipua ai le atunuu i le toafilemu ma le mautū o le itulagi i le tele o tausaga ua mavae, e tumau le faamoemoe o tagata mai isi atunuu e faalauaitale lo latou aiaina o faiga tau puipuiga i le itulagi lenei, ma o se tulaga o le a atili faatautavā ai faiga o malupuipua ai. E avea lea ma mea e afaina ai faiga faavae ua leva ona faataatia na aogā mo lo tatou itulagi.

Mo se faataitaiga, i le 2019, na faasilasila ai e Saina se faamoemoe e faatuputeleina ana faiga faamilitari i totonu o le Pasifika, ia faatutusa ma sini o faamoemoe i ai i tulaga tau pulega, fefaatauaiga ma le tamaoaiga.<sup>10</sup> E tele isi atunuu o loo tau saili foi auala e siitia ai a latou sootaga ma le Pasifika ma le telē o lo latou sao o molimauina ma e avea le siitia o faiga nei e atili lavelave ma faatuputeleina ai faiga faatautavā.

### **Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:**

- o le atili faamalosi o faiga faatautavā tau fefaatauaiga e avea ma luitau i faavae ua iai nei i le malupuipua o le itulagi o le Pasifika
- faateteleina o le lavelave o luitau ma le maoa'e o faiga o soli ai tuaoi i le va o atunuu ma luitau tau puipuiga tumaoti, e pei o soligatulafono maopoopo i le va o atunuu
- o le faatupulaia o manaoga e malupuipua ai le ola ma le soifua o tagata, e aofia ai meaai ma le suavai
- o mea o tutupu ma faalavelave ona o suiga o le tau ua aafia ai le tele o atunuu i le taimi lava e tasi ma e moomia ai le faafaigaluega o le tele o atinae e mafai ai e tagata Pasifika ona vave faafoisia lo latou malosi ma gafatia ona tali atu.

**Sauniuni nei mo le lumanai:**

- E atagia i talatalaga o faia pea i totonu o le Pasifika le loloto o sootaga ma le itulagi ma ona tagata ma e uunaia i luga o se lagona e fia maua le toafilemu, ola laususia ma le vave faafoisia o le malosi i atumotu tuaoi.
- O loo faamalosia e le Aotearoa New Zealand’s Pacific Resilience Policy le avea ai o le Pasifika ma fatu o la tatou faasinomaga ma manatu lautele, ma e talia ai le manatu o le auala faatuatuaina sili e mafai ai ona tatou tali atu i le lavelave o luitau e auala atu i se faiga maopoopo, ma e faia i luga o faiga faapaaga vavalalata ma isi atumotu o le Pasifika, e faatupu ai le vave faafoisia o le malosi mo se vaitaimi mamao.
- O le taliaina o le tele o vala e tau auala mai ai aafiaga i le malupuipua o le atunuu e aafia ai agafesootai, faiga faaupufai, tamaoaiga ma le siosiomaga, ma o lea ua matou folafola ai le tuuina atu o le \$1.8 piliona i le atinaega o polokalame e lagolagoina atumotu o le Pasifika mai le 2021 seia aulia le 2024 i vaega e pei o aoaoga i le Pasifika, soifua maloloina, tamaoaiga tutoatasi, aiatatau faaletagata ma atinae e faaafia uma ai tagata, pulega ma faiga faatemokarasi, atinae tetele, ma le tele o isi taumafaiga.
- Ua loa tausaga o le lagolagosua ua tatou faia e faatupu ai faiga e malupuipua ai atumotu o le Pasifika, mo se faataitaiga, o puipuiga a ofisa o leoleo, ofisa o tiute, femalagaiga ma le malupuipua o faiga faainitaneti. O galuega faapaaga vavalalata ma isi, aemaise Ausetalia, ua mafai ai foi e Aotearoa Niu Sila ona tuuina sa’o atu puipuiga ma le malupuipua i le itulagi, e aafia ai faiga e taofia ai e pei o leoleoga o faiga faiva, ma le tali atu i taimi o faalavelave faafuasei – mo se faataitaiga i le uma ai o se mala faalenatura.
- Tatou te lagolagoina malosi foi i latou o taimua i taumafaiga e mafai ai e le Pasifika ona tali atu i faafitauli o le Pasifika lava, ma e tele faalapopotoga i le itulagi o loo tatou fesoasoani i ai e pei o le Forum Fisheries Agency, o le Pacific Transnational Crime Coordination Centre, o le Pacific Islands Chiefs of Police, ma isi.
- *O le a faaauu pea le tāua o auala e galulue faatasi ai Aotearoa Niu Sila ma le Pasifika e pei lava ona faatāua galuega o tatou faatinoina. O le atagia i a tatou galuega o sootaga vavalalata, nonofo fealofani ma puipuiga lelei faapea ai ma le talisapaia o le mamalu o atumotu o le Pasifika o le a mafai ai ona faamalosia atili tatou faiga faapaaga.*

## Malupuipua o Aotearoa Niu Sila i le isi 10 – 15 tausaga

O loo faatuputupulaia aafiaga i le malupuipua o Niu Sila, faapena ai ma le lavelave ma le fesootai o aafiaga uma. E faalagolago le tino mai o faiga pito sili ona aogā tatou te tali atu ai i le faaafia o Tagatanuu Niu Sila i fesootaiga ma talatalaga o fia faia.

Matou te iloa lelei foi e lē mafai e matagaluega a le malo ona faataunuu le tele o galuega e tali atu ai i aafiaga o le malupuipua o le atunuu ma e fia iloa sou manatu i foliga o le malupuipua o le atunuu i le 10 i le 15 tausaga.

O le vaega leni o le a tatou:

- tilotilo ai i nisi o manaoga autu faatautavā ma filifiliga o fetaia’i ma i tatou
- mafaufau i mea ua manatu le mamalu o le atunuu e tatau ona matou faatinoa (e auala atu i le mataupu o faatalatalanoaina i le, National Security Public Survey ma manatu o matātā lautele o faatinoa faiga e malupuipua ai le atunuu) ina ia faasili le lelei o fesootaiga ma tagata, ona
- folasia lea o nisi o manatu e tusa ma se taatiaga o foliga o le malupuipua o le atunuu i le lumanai, ma faiga e mafai ai ona tatou suia auala o tatou faasoa atu ai ma le eseese o tagata i Niu Sila ma ia tino mai manatu nei i se vaitaimi mamao.

Matou te fia iloa sou manatu, e aafia ai ni fautuaga o isi laasaga e fia agai atu i ai.

### O manaoga autu faatautavā ma filifiliga o fetaia’i ma i tatou

O le tele o manaoga ma filifiliga fai o fetaia’i ma i tatou e avea lea ma faalavelave i a tatou taumafaiga e faataunuu le maua o se lumanai manaia mo le malupuipua o Niu Sila. O le gasologa o le soifuaga i le lumanai e moomia ai e Tagatanuu Niu Sila ona faapaleni ma faamuamua manaoga ma filifiliga fai, ma le mautinoa e mafai ona suia manaoga ma faamoemoega o tagata.

Mo se faataitaiga, e moomia ona tatou faapaleni ma faamuamua le va o mea nei:

- tulaga patino e lē faalauaiteleina, malupuipua ma le faatuatuaaina
- mea o moomia ma manaoga o tagata taitoatasi ma tagata uma
- saoloto le faaali o manatu ma faafetoai faaupuga faatupu inoino, talitonuga matuiā ma le faasalalau ma le mautinoa o faamatalaga sese
- faafaigaluega galuega e tali atu ai i faalavelave o tutupu i le taimi nei ma siitia le malamalama ma le tomai e tali atu ai i luitau o agai mai, e aafia ai le nofo sauniuni mo aafiaga tetele ma e seāseā tutupu, ma le
- eseese o manaoga mo fesoasoani tupe a le malo, e aafia ai ma le eseese o tulaga o faamoemoe i ai le mamalu o le atunuu i mea o faafaigaluegaina ai tupe auā le malupuipua o le atunuu. O tulaga o faamoemoe i ai le mamalu o le atunuu ma tulaga o le lagolagosua o faia, e lē faapea o le a atagia ai le siitia o aafiaga ma luitau faasaga i le malupuipua o Niu Sila atoa.



## E moomia lo tatou talanoa i le malupuipua o le atunuu

O mea o tutupu i tausaga talu ai nei, e pei o le taua i Europa, o le sasao o le faamai i le lalolagi, o tagata faatiga loto o lamalama ia Niu Sila, ma le fesiitai o suiga i pulega tonu, o mea nei e faateteleina ai le popole ia i tatou o le malupuipua o le atunuu.

Tatou te iloa le popole o Tagatanuu Niu Sila ma le fia iloa atili o mea o tutupu, ma o nisi e fia auai atili i auala o faatino ai le tali atu – ma e iai lo latou talitonuga e tatau ona tatou vave faagaii se tali atu pe a faatusa i mea na feagai ai ma i tatou atoa ma suiga i faiga faamata'u ua molimauina i le lalolagi atoa.


### Mai le National Security Public Survey:

- o le toatele o sui na auai i le suesuega (58 pasene) na fia iloa atili faiga faamata'u, luitau ma avanoa o afaina ai le malupuipua o Niu Sila
- o le 39 pasene na faaali le fia faailoa o manatu po o le auai i faatalatalanoaga lautele i le malupuipua o le atunuu, ma le
- 25 pasene e iloa nofoaga e maua ai isi faamatalaga i le malupuipua o Niu Sila ae, na o le toatasi mai le toalima na manatu o loo lava ma tele faamatalaga o faasoa mai e matātā o faatino le malupuipua o le atunuu.


**"E tatau ona tatou taumafai atili e faatalanoa ma Tagatanuu Niu Sila faiga faamata'u i le malupuipua o Niu Sila, aemaise le faaafia o tagata e pito sili ona aafia mai faiga faamata'u i le malupuipua o le atunuu." Manatu faaalii sui auai o le suesuega**

I le taimi nei o loo lava ma tele faamatalaga o faasoa atu e matātā o faatino galuega i le malupuipua o Niu Sila i ona tagatanuu.

National Security Public Survey: Information Channels used and Preferred Channel for Information on threats



A faasolo ou manatu i faiga faamata'u uma ua tatou ta'ua, e te talia pe teena faamatalaga taitasi o ta'ua i lalo?



Alagaaga: National Security Public Survey 2022

E toatele tagata na tuuina mai manatu i le mataupu o faatalanoaina i tulaga o latou manatu e lē o manino ma e faigata ona maua e tusa ma galuega o faia e matātā o faatinoa le malupuipua o Niu Sila. Na latou fia iloa atili faiga faamata'u e sili ona avea ma popolega ia i latou. Na ta'ua foi e sui auai o le suesuega e sili ai le tuuina atu o faamatalaga i faiga faamata'u i le malupuipua o le atunuu e auala atu i nusipepa i luga o le initaneti ma le TV e matamata fua ai polokalame.

Na faaalua foi e tagata na faao mai manatu ma i latou na auai i le suesuega:

- faiga o faafaigata ai ona maua faamatalaga. E aofia ai le itiiti o faamatalaga o faamatalaina ai faiga faamata'u i le malupuipua o le atunuu, o mafuaaga e talafeagai ai ona latou silafia faiga faamata'u ma auala e tatau ai ia Niu Sila ona tali atu ai
- na ta'ua foi le lavelave o le tele o le mau matagaluega o aafia i galuega auā le malupuipua o le atunuu, ma
- ta'ua ai e iai nisi o tagata o lagona le palaai e fesootai ma matātā o faatinoa galuega i le malupuipua o le atunuu ona o tulaga na feagai ai ma i latou.

Na apoapoi foi i faiga e maua gofie ai matātā o faatinoa galuega auā le malupuipua o le atunuu e auala atu i le:

- faia o polokalame anoa i tua o nuu ma afioaga (e mafai ona fesoasoani ma uunaia sui o tagata e auai i galuega e puipui i le malupuipua o Niu Sila)
- saunia ma faasalalau se taiala faataatia mo talatalaga, ma
- saunia se faafanua o galuega faatino e limataitaiina le atinaega o faiga faapaaga ma le mamalu o le atunuu i le malupuipua o le atunuu.

## Eseese o talitonuga mautinoa i le gafatia e matagaluega a le malo ona tali atu.

Na faailoa mai i le National Security Public Survey le eseese o talitonuga mautinoa o Tagatanuu Niu Sila i matātā a le malo latou te saunia le puipuiga e tusa ma ituaiga faiga faamata'u.

Ina ua fesiligia pe faapefea i matagaluega a le malo ona atiae le talitonuga mautinoa o le mamalu o le atunuu, na faamamafa ai e sui na auai i le suesuega le moomia e matagaluega ona:

- vave tali mai
- nofo sauni, ma
- toaga e siitia le iloa ma le malamalama o tagata lautele.

## O ā foliga o se lumanai manaia mo le malupuipua o le atunuu?

E sefulu vaega autu ua matou manatu e mafai ona lagolagoina se lumanai sili ona manaia mo le malupuipua o Niu Sila i le isi 10 i le 15 tausaga o sosoo ai. E fesoasoani ia lelei atili ai a tatou tapenaga ma le tali atu i aafiaga ma luitau o folasia i le ootoga leni. E puupuu lava le faamatalaina o le siisii o le gataifale, ma o vaega nei e ono toe faia i ai isi sailiiliga i le lumanai.

E faavae vaega nei i luga o le faatuatuaga, talitonuga mautinoa, ma le felagolagomai – ma e faatupu atili ai le vave faafoisia o le malosi i le atunuu ma lagolagoina ai lo tatou vave tali atu ma puipui i le malupuipua o le atunuu.

O le tele o vaega nei e fesootei, ma e lagolagoina la tatou vave tali atu faatasi, ma e faavae i tomaitutusa o aafiaga ua tatou iloa e auala atu i faatalatalanoaga ma faipule, Māori, sui a le malo, tomaituesue, pisinisi, ofisa faasalalau, taitai o nuu ma tagata ma sui o le mamalu o le atunuu.

O loo gasolo pea le tino mai o nisi o taumafaiga, mo se faataitaiga, e auala atu i le faia o se New Zealand's first National Security Strategy ma le toe iloiloina o la tatou faiga faavae i le malupuipua o le atunuu e tusa ma iuga ma fautuaga na maua mai i le Royal Commission of Inquiry o le osofaiga faaterorisi i le malumalu muselemi i Kalaiesetete. Peitai, e iai lo matou manatu o loo iai avanoa faaopoopo e aogā ona tatou tilotilo i ai.

### O vaega autu o se lumanai manuia e aofia ai:

- **Manino ma maua gofie faamatalaga lautele** – faasoaina atu faamatalaga ma ia faafaigofie ona maua ma faitau i ai tagata e siitia ai le iloa e le mamalu o le atunuu o aafiaga i le malupuipua o le atunuu, ma galuega o tatou faatinoa e tali atu ai ma auala e mafai e le mamalu o le atunuu ona fesoasoani e tuutiitia ma tali atu i ai. O se tulaga lea e mafai ai ona faasa'o le lē tutusa o faamatalaga ma lagolagoina le auai ai o tagata.
- **Tausia o le malupuipua o le atunuu** – E lagolagoina Pule Sili o matātā o faatinoa galuega auā le malupuipua o le atunuu ia autasi e tausi malosi i tulaga ua tofia ai, ia mataala i mea o agai mai ma saunia fautuaga ma faatino galuega i luitau ma avanoa o agai mai, ina ia fesoasoani i faaiuga fai a le faiga malo o pulea le atunuu i le taimi nei ma le lumanai.
- **Faamalosia atili taitaiga a le malo i le malupuipua o le atunuu** – ia tutusa lea ma fautuaga o ta'ua i le Royal Commission of Inquiry o le osofaiga faaterorisi i le malumalu muselemi i Kalaiesetete, ma o lava ma atoatoa faamaumauga e fua i ai faaiuga fai a minisita a le malo ma ia "faateleina felafolafoaiga, ma le lagolagosua a vaega faaupufai uma, mo mataupu i le malupuipua o le atunuu."<sup>11</sup>
- **Faiga faapaaga faavaomalo e ola ma faamalosia atili ai le malupuipua o le atunuu** – ia iloa lelei o mea o faamata'uina ai le malupuipua o le atunuu i le taimi nei ma le lumanai o mea atonu na foafoa mai isi vaipanoa o le atu laulau ma e tata ai ona faia talatalaga faavaomalo ma faamaopoopo se tali atu; ia mataala i le faasoaina o faamatalaga anagatā, tomaitutusa na feagai ai ma ia galulue faatasi ma isi e tutusa a tatou aga tausili, auā o itu nei e tāua i le lagolagoina o le malupuipua o le atu laulau ma le itulagi, ma puipua mea o aiaina e lo tatou atunuu.
- **O se matātā o faatinoa galuega e malupuipua ai le atunuu ma e atagia ai le toatele o tagata eseese i lo tatou atunuu ma e mafai ona suia ma e gafatia ona tali atu i luitau i le lumanai** – i le lumanai, o le tulai mai o se matātā ua atoa ona

faaaaupegaina i ituaiga tomai ma agavaa eseese e taulimaina galuega auā le malupuipua o le atunuu, o le a gafatia ona tali atu i le lavelave o faaletonu faasaga i le malupuipua o le atunuu o loo tulai mai i lea taimi. O le a sua foliga eseese o faiga e taulimaina ai le matātā e tusa ma suiga ua vaaia i Niu Sila, ma taiala faataatitia e faalauiloa ai faiga eseese ma le faamausaliina o le faaafia o tagata ma faiga uma. Matou te faailoa tulaga ua fautuaina e le Royal Commission of Inquiry mo le atiae o se matagaluega aoao ua anoa ona faaaaupegaina auā le malupuipua o le atunuu, ma e faatonuina e tusa ma le tulafono, ma o le matafaioi a le matagaluega le faia o taitaiga mo le malupuipua ma le anoa o faamatalaga.

- **Ia leai se noataga i finauga o fai, ma fautuaga mai, tomai e ese mai le malo** – ia maua e matātā tau aoaoga ma tomai faapitoa fesoasoani tupe o latou moomia latou te saunia ai fautuaga tutoatasi ma faatupu ai lo tatou malamalama i faiga faamata’u e ono fetai’i ma i tatou i le lumanai, ma auala e mafai ai ona tatou ausia tulaga nei.
- **Mataala ma faasoaa atu i faasalalaua a ofisa faasalalau** – e lagolagoina e faasalalaua mataupu i le malupuipua o le atunuu e auala atu i le tatala o avanoa e faia ai finauga i faiga faamata’u i le malupuipua o le atunuu, o faiga e ono faamalieina uma ai itu eseese atoa ma malosiaga ma vaivaiga o faiga o faatinoina ai galuega. Ia atagia i faasalalaua le eseese ma le loa o manatu mai soo se vaega uma o Niu Sila ma ia manino lelei le faamatalaina o faiga faamata’u ma luitau, ma ia amanaia le vave faafoisia o le malosi o tatou tagata ma faamanatu luitau na tatou tali faatasi atu i ai le atunuu atoa.
- **Amanaiaina ma galulue ma paaga i fafo atu o le malo** – o le a manino ma malamalama lelei i tomai faapitoa e maua mai le mamalu o le atunuu e fesoasoani e tuuaititia ma tali atu i luitau i le malupuipua o le atunuu (ua tatou iloa le telē o le tomai ma le agavaa mai pisinisi ma tagata ma o i latou nei o nofo tapuai ma sauni e lagolago le tali atu i faiga faamata’u i le malupuipua o le atunuu).
- **O tagata o lagona o loo uunaia ma faaaaupegaina i latou e faasoaa ma auai i mea o faia e matātā i le malupuipua o le atunuu** – matou te iloa le tāua o le atiae o le faatuatuaga ma le talitonuga mautinoa i Tagatanuu Niu Sila o le tasi i le isi ma a tatou pulega. E uunaia, lagolagoina ma faatupe le auai ai o tagata i mataupu i le malupuipua o le atunuu e auala atu i le faasoaina o faamatalaga ma atiae le tomai e tusa ma "tulaga masani" o se vaega i totonu o matātā i le malupuipua o le atunuu.
- **Faatuatuaina ma tali atu o pulega** – o se faiga faavae i le malupuipua o le atunuu e maua ai e tagata le faatuatuaga ma le talitonuga mautinoa (o lona uiga, ma ua 'faatulafonoina e tausī ma faatino galuega') ma e sili atu ona aogā faatusa i se faiga faavae e lē o mafaia lea itu.

## O le isi laasaga o sosoo ai?

O le faamoemoe o le ootoga leni le lagolagoina o le faifai pea o faatalatalanoaga ma le toatele o tagata eseese i Aotearoa Niu Sila i lamatiaga faasaga i le malupuipua o le atunuu, luitau ma avanoa. Matou te talia ma uunaia le faailoa mai o lou malamalama ma manatu i le ata faataitai leni – aemaise lava i tulaga nei:

- E sefulu vaega tāua o loo folasia i le ootoga e mafai ona lagolagoina le malupuipua o Aotearoa Niu Sila, ma
- O ou manatu e lagolagoina ai le malupuipua o Aotearoa Niu Sila.

## Auala e faaoo mai ai ou manatu

E mafai ona e faasoa mai ou manatu i luga o le initaneti:

<https://consultation.dpmc.govt.nz/long-term-insights-briefing/draft-ltib-consultation>

O le a matou iloiloina manatu uma na faaalua a o lei faamae'a lelei le ootoga. O le a faasoa atu i Minisita e talafeagai ona silasila i ai ma faamauina i luma o le Palemene le ootoga faaii.

## Faasalalauina o ou manatu na faaalua

O le a faasalalauina i le upegatafailagi a le DPMC se aotelega o manatu na faaalua e le mamalu lautele. O le a matou aoina igoa ma faamatalaga e faafesootai ai tagata na tuuina mai manatu, ma ia manatua matou te lē faasoa pe faasalalau faamatalaga patino e mafai ai ona faafesootai tagata.

O manatu uma na tuuina mai e ono faalauiloa i lalo o le Official Information Act 1982. Afai e te lē manao e faasalalau ou manatu, faamolemole faailoa le tulaga lea ma mafuaaga ua e manatu ai e tataua ona taofia ou manatu pe a faaoo mai au tali.

*Faafetai mo le faaavanoa o lou taimi, ma le faasoa mai o ou manatu ma lagona.*

## Pepa Faaopoopo A – Uiga o Upu

**Alalai mai o isi atunuu** – O gaioga a se isi atunuu ese, po o se sui, ma le faamoemoe e faatosina, faalavelave pe faaleaogāina mea o aiaina e se atunuu e auala atu i faiga faalilolilo, faitogafiti po o le faamata’u. O le faamoemoe o le alofia po o le faaleaogāina o faiga masani e suia i maliega faavaomalo ina ia faatuputeleina ai lo latou malosi. E ui i auala faatoafilemu o faia e atunuu e aofia ai Niu Sila e faasili ai mea o latou aiaina, e avea pea le faaaogaina o faiga faitogafiti ma le fai faamalosi o loo aafia ai le malupuipua o le atunuu.

**Faa-agaaga** -e faatatau i le tele o faiga faatautala e aoina ai faamatalaga, mea po o tomai mo le faamoemoe e faatupu ai faiga faamaualuga i se isi o faatautavā i ai.

**Faamatalaga sese** – faamatalaga e lē moni pe taufaasese, ae e lē o faia pe faasoa atu ma le faamoemoe e faatupu ai lamatiaga

**Faasalalau ma le mautinoa o faamatalaga sese** – O faamatalaga sese po o le suia o faamatalaga ma le mautinoa ma faasoa atu ma le faamoemoe e faatupu ai lamatiaga po o se isi faamoemoe sili atu

**Faiga faaterorisi** – Tulafono o aofia ai (ae e lē o faatapuraa i ai) gaioga e mafua ai le maliu po o le faamanu’alia leaga tele ai o le tino ma le faamoemoe e faamata’uina se faitau aofai o tagata po o le faafitafita ona faamalosi o le malo e fai (po o le lē faia) o se mea.

**Felagolagomai** – O tulaga e lagona ai e tagata uma le saogalemu, faatāuina ma le amanaiaina, ma le lagona talisapaia ma le mafai ona auai atoa i mea faitele. O se atunuu e felagolagomai e iloa ai e tagata taitoatasi ma vaega o tagata le lagona talisapaia, faaafia i meafai, auai, amanaia ma e agatonu ma tulafono.

**Malupuipua o le atunuu** – [o loo iloiloia i le taimi nei] O se noataga e faataga ai Tagatanuu Niu Sila ona ola ma soifua ma le talitonuga o loo aunoa i latou ma le popole ma e mafai ona faaoga avanoa e siitia ai tulaga lelei o le soifuaga. E faaoga i Niu Sila se faamatalaga lautele e faamatalaina ai le malupuipua o le atunuu. E atagia ai le afaina o i tatou i le tele o lamatiaga ma aafiaga ona o faiga faamata’u e afaina ai puipuiga, ma e amata mai mafuie, vaomatua ua mu ma galulolo faasolo atu i faiga faaterorisi, alalai mai o isi atunuu ma faiga faa-agaaga, ma le faapiopio. O aafiaga nei e lē mafai ona aveesea mai le lalolagi o tatou ola ma soifua ai ma e lē faigofie le taumafai e puleaina.

**Osofaiga faainitaneti** – soona fai ma le mautinoa o faiga faavae o teuina ai faamatalaga ina ia faaoo ai faiga lamatia.

**Soligatulafono faainitaneti** – Soligatulafono e auala atu i le faaaogaina o komepiuta, ma e afaina sa’o ai faiga o faagaioia ai komepiuta. Mo se faataitaiga e aofia ai le saunia o polokalame faakomepiuta leaga, faafiti i osofaiga ua afaina ai nisi o auaunaga, ma faiga taufaasese e auala atu i imeli

**Soligatulafono maopoopo i le va o atunuu** – o se soligatulafono e faia i le va o tuoai o atunuu, po o se soligatulafono e faia i se tasi o atunuu, ae malosi sootaga i isi atunuu.

**Tagata faatiga loto** – O se tagata po o se faalapopotoga o fai ma le mautinoa le faaoo o lamatiaga.

**Talitonuga matuiā** – o le taumafai e ta’u amiotonuina le faaoga o sauaga ma le faamoemoe e suia atoa tulaga i totonu o faiga malo, talitonuga, po o se atunuu. E masani i

ituaiga sauaga nei ona lamalama i vaega o tagata o taumafai e lepetia pe taotaomia le ola po o le faaleaogāina o latou talitonuga matuiā

**Totogi ola o polokalame faakomepiuta** – O polokalame faakomepiuta e taofia le maua e tagata o latou faila po o polokalame tau komepiuta se’i vagana ua totogi atu se sala oti.

**Tau pulega faavaomalo e faavae i luga o tulafono** – O se faiga faavae aoao i le atu laulau e ‘tonu ma sa’o,’ ma e faavae i luga o tulafono, aga taualoa ma faalapotopotoga o lagolagoina atunuu ia galulue faatasi, ma e maua mai ai le toafilemu, faiga e mafai ona mate’ia ma le maopoopo.

## Pepa Faaopoopo B – Faamatalaga faaiu

- <sup>1</sup> O matagaluega nei o aofia ai o le Department of the Prime Minister and Cabinet, Ministry of Foreign Affairs and Trade, New Zealand Security Intelligence Service, Ministry of Defence, Government Communications Security Bureau, New Zealand Customs Service, New Zealand Defence Force, New Zealand Police, ma le Ministry of Business, Innovation and Employment.
- <sup>2</sup> E maua foi le lipoti i le upegatafailagi a le DPMC <https://dpmc.govt.nz/our-programmes/national-security/national-security-long-term-insights-briefing/2022-ipsos-national>. Na faatautaia le suesuega i luga o le initaneti e le IPSOS New Zealand mai le aso 11 Fepuari – 2 Mati 2022. O le vaitaimi tonu foi lea na osofaia ai e Russia le Ukraine ma le Solo Tetee i le Palemene. E lē tau mate le aafia o manatu ma le tali atu o tagata ona o tulaga nei.
- <sup>3</sup> E maua faamatalaga auiliili i le New Zealand’s National Security System. Tagai i le <https://dpmc.govt.nz/our-programmes/national-security-and-intelligence/national-security/new-zealands-national-security>
- <sup>4</sup> Stats NZ (2021) National ethnical population projections: 2018(base)-2043. Tagai i le <https://www.stats.govt.nz/information-releases/national-ethnic-population-projections-2018base-2043>
- <sup>5</sup> Microsoft (Iuni 2022). Defending Ukraine: Early Lessons from the Cyber War. Tagai i le <https://query.prod.cms.rt.microsoft.com/cms/api/am/binary/RE50KOK>
- <sup>6</sup> National Cyber Security Centre, Cyber Threat Report 2022/21. Tagai i le <https://www.ncsc.govt.nz/newsroom/ncsc-cyber-threat-report-shows-rise-in-malicious-attacks-on-new-zealand/>
- <sup>7</sup> CERT NZ. 2021 Report Summary. Tagai i le <https://www.cert.govt.nz/about/quarterly-report/2021-report-summary/>
- <sup>8</sup> Transnational Organised Crime in New Zealand: Our Strategy 2020 – 2025. Tagai i le <https://www.police.govt.nz/sites/default/files/publications/transnational-organised-crime-in-new-zealand-our-strategy-2020-to-2025.pdf>
- <sup>9</sup> Stats NZ (2012). Tamaiti ma aiga e lamatia gofie: O faamaumauga na maua mai le New Zealand General Social Survey. Tagai i le <https://www.stats.govt.nz/assets/Uploads/Retirement-of-archive-website-project-files/Reports/Vulnerable-children-and-families-Some-findings-from-the-New-Zealand-General-Social-Survey/vulnerable-children-and-families.pdf>
- <sup>10</sup> New Zealand Ministry of Defence (2021) Defence Assessment, He Moana Pukepuke E Ekengia E Te Waka, A Rough Sea Can Still be Navigated. Tagai i le <https://www.defence.govt.nz/assets/publication/file/Defence-Assessment-2021.pdf>
- <sup>11</sup> Royal Commission of Inquiry o le osofaiga faaterorisi i le malumalu muselemi i Kalaiesetete 15 Mati 2019. Fuaiupu 2.3 Parakarafa 24, 2. Fautuaga i le faaleleia o galuega e faafetaui ai faiga faaterorisi i Niu Sila. Tagai i le <https://christchurchattack.royalcommission.nz/the-report/findings-and-recommendations/chapter-2-recommendations-to-improve-new-zealands-counter-terrorism-effort/>